

C'EST LE REQUÊTE QUE SIRE JEHAN WETTINS ET PLUSIEURS
AUTRES DES CONFRÈRES FISENT A TOUS LES CONCHITOIRES DE LE
HALLE DE TOURNAY.

Sacent tout cil qui sont et qui avenir sont : Que en l'onneur et en la remembrance de Dieu tout puissant et de la benoite glorieuse Vierge Marie, se chière mère, et de Monseigneur saint Jaques, Apostle, vinrent et se apparurent devant les prouvos, jurés et tout le conseil de le cyté de Tournay, sires Jehans Wettins li aînés et plusieurs autres bonnes personnes dignes de foy, en suppliant et requerrant asdis conchitoires qu'il leur pleüst acconsentir, gréer et ottroyer de faire grace à eauls par quoy il peussent faire et par édifier une maison qui commencié est pour herbregier, lever et couchier les povres trespasans en la maison que li dis sires Jehans Wettins avoit donnet pour ce faire séans à sainte Catherine et le gardin derrière, tenans as murs de le ville à l'en lez et al hiretage qui fu Jaquemon Morille à l'autre lés, et si s'estent chius hiretages par derrière jusques à le porte de Wasiers, à tel cens et à telles rentes que li dis héritages doit par an. — Item prièrent et requisent lidit preudomme asdis conchitoires que, pour les nécessitez de ledite mason et les povres agouverner et soustenir, il leur pleüst qu'il peüssent acquerre dedens le justice de Tournay l. livres de revenue par an, en telle manière que li maires des eskievins de Tournay en fust adies, ahiretez et en rechiust le werp à ots et au nom de ledite mason et de tout ce aussi que toutes les bonnes gens qui dévotion y ont eu de donner et aront en temps à venir, et que adies lidis maires en soit sires et souverains à tousjours et que tout li bien de ledite mason soient gouvrenet al assens des eskievins de Tournay, et en face on chascun au bon compte devant eauls. Et s'il advenoit qu'il pleüst en temps avenir as personnes qui tenroient et possesseroient des hiretages sour quoy on auroit acquis aucunes rentes des l. livres dessusdites ou aucuns autres hiretages ou rentes que aucunes autres personnes trespasées y aroient donnet ou aumonnet, que cil qui tenront lesdis héritages ou deveront aucunes desdites rentes les puissent rachater et avoir par pris de sermentez de Tournay, en quel temps que ce soit, sans nul contredit et tous dis rentes paiant al avenant d'ou temps, et que li denier que on en recevra de telz racatz soient et demeurent en le main des eskievins de Tournay pour acater

autres rentes ou hiretages par le conseil des preudommes qui adont y seront, qui soient de autelle manière et condition que ly hiretage que on aroit racatet estoient. Chou entendu que li hoir ledit seigneur Jehan Wettin ne autres pour cauls ne pocent ne ne poront racater jamès ne demander riens al hiretage que ledis sire Jehan Wettins y donist et si puet toudis et en tous temps li ville de Tournay, pour guerre ou pour ost, à toutes les fois que elle en ara besoing, aler et venir as murs et as tours pour le nécessité de la ville, sans nul contredit. Et à le supplication et requeste que li devant dis sires Jehans Wettins et li preudomme dessusdit ont fait au conseil de le cité de Tournay, tout li quatre conchitore, par l'acord d'eaus tous ensemble, en l'onneur de Dieu principalement, de le benoite Vierge Marie et de Monseigneur saint Jaques Apostele et pour les ames de tous cheaus et de toutes celles qui bien ont fait et feront à ledite mason, gréèrent, loèrent et ottroyèrent audit seigneur Jehan Wettin et as preudommes dessus nommés toutes les choses dessusdites à estre faictes bien et loialment, en le fourme et manière que deseure est dit et deviset. Ce fu fait l'an de grace Nostre Seigneur mil ccc et xxx, le witième jour de fevrier, comme il appert de ladite remonstrance et par ung archien cartulaire en date de lan mil ccc ij.

Item que ledit seigneur Jehan Wettin a aussi encores donné audit hospital une maison, gardin et héritage pour en posséder très fonsièrement et à tous jours, tenant d'un lés audit hospital mesmes et d'autre lez allant du long jusques à la muraille et frumeté nouvelle de la ville de Tournay.